

*Sarajevo, 10.02.2016. godine
Broj: 95/16*

**ZAPISNIK I ZAKLJUČCI SA JEDANAESTE SJEDNICE
PREDSJEDNIŠTVA SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

U Općini Čitluk je dana 10.02.2016. godine održana Jedanaesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza su prisustvovali:

1. Emir Bubalo, načelnik Općine Konjic;
2. Nedžad Koldžo, načelnik Općine Novo Sarajevo;
3. Muhamed Ramović, načelnik Općine Goražde;
4. Kristijan Petrović, po ovlaštenju načelnika Općine Tomislavgrad;
5. Ivo Jerkić, načelnik Općine Čitluk i predsjednik Predsjedništva Saveza;
6. Asim Mekić, načelnik Općine Busovača;
7. Ljubo Grizelj, načelnik Općine Grude.

Pored gore navedenih, sjednici su prisustvovali i: Predrag Šupljeglav, Grad Mostar, Miroslav Landeka, Grad Mostar, Vildana Smajović, Općina Novo Sarajevo, Alena Ahmetspahić – Fočo, Poslovne novine, Vesna Travljanin, direktor Saveza, Zlata Turkić, viši saradnik za rad sa skupštinskim komisijama i institucijama vlasti i Selma Fišek, viši saradnik za pravna pitanja.

Ivo Jerkić je pozdravio prisutne i otvorio Jedanaestu sjednicu Predsjedništva Saveza. Predložio je Dnevni red kako slijedi:

1. Zapisnik i Zaključci sa Desete sjednice Predsjedništva Skupštine Saveza općina i gradova Federacije BiH
2. Zapisnici sa sjednica komisija Saveza:
 - a) Komisija za ekonomski razvoj općina i gradova i finansije
Izjavitelj: Radinka Dujak, predsjednica komisije
 - b) Komisija za međunarodne veze, saradnju i evropske integracije
Izjavitelj: Ismar Alagić, predsjednik komisije
 - c) Komisija za ustavna i zakonodavna pitanja
Izjavitelj: Vildana Smajović, predsjednica komisije

3. Imenovanje predstavnika Saveza u Arbitražna tijela za arbitražu Budžeta općina Usora i Drvar

Izvjestilac: Vesna Travljanin, direktor Saveza

4. Inicijative:

a) Inicijative za provođenje mjera Akcionog plana za djecu Bosne i Hercegovine 2015.-2018. godina

Izvjestilac: Vesna Travljanin, direktor Saveza

5. Informacije:

a) Informacija sa Treće sjednice Komisije za lokalnu samoupravu Predstavničkog doma Parlamenta Federacije Bosne i Hercegovine

Izvjestilac: Vesna Travljanin, direktor Saveza

b) Poziv Odbora za pravdu, opću upravu i lokalnu samoupravu Doma naroda Parlamenta Federacije Bosne i Hercegovine za održavanje zajedničkog sastanka sa predstavnicima Saveza

Izvjestilac: Vesna Travljanin, direktor Saveza

c) Informacija o održanom sastanku sa gradonačelnikom Grada Sarajeva

Izvjestilac: Vesna Travljanin, direktor Saveza

6. Tekuća pitanja

a) Prijedlog za saradnju na Projektu „Gradovi/općine i biznis“ (Općine i gradovi kao poslovni centri konkurentne privrede)

Izvjestilac: Alena Ahmetpahić-Fočo, urednik Poslovnih novina

b) Treće evropsko prvenstvo u nogometu za gradonačelnike

Izvjestilac: Vesna Travljanin, direktor Saveza

Predsjedništvo Saveza je jednoglasno usvojilo predloženi Dnevni red.

1. Zapisnik i Zaključci sa Desete sjednice Predsjedništva Skupštine Saveza općina i gradova Federacije BiH

Ivo Jerkić je otvorio raspravu, te je dao na glasanje Zapisnik i zaključke sa Desete sjednice Predsjedništva Skupštine Saveza općina i gradova Federacije Bosne i Hercegovine.

Predsjedništvo Saveza je jednoglasno usvojilo Zapisnik i zaključke sa Desete sjednice Predsjedništva Skupštine Saveza općina i gradova Federacije Bosne i Hercegovine.

2. Zapisnici sa sjednica komisija Saveza:

a) Komisija za ekonomski razvoj općina i gradova i finansije

Zlata Turkić je izvijestila o održanoj sjednici i o tačkama koje je razmatrala Komisija za ekonomski razvoj općina i gradova i finansije.

Asim Mekić je istakao da se Savez mora boriti da u novom Zakonu o pripadnosti javnih prihoda u Federaciji Bosne i Hercegovine ima bolji položaj, te da trebamo tražiti mogućnost za učešće u izradi novog zakona.

Ivo Jerkić je naveo da je jasno da svi nemaju iste interese kada je u pitanju Uputstvo o određivanju udjela kantona, jedinica lokalne samouprave i mjerodavnih kantonalnih ustanova za ceste u prihodima od indirektnih poreza i načinu raspoređivanja tih prihoda za 2016. godinu (u daljem tekstu: Uputstvo).

Ljubo Grizelj je istakao da je bolje da Predsjedništvo Saveza ne raspravlja o Uputstvu iz razloga što u vezi tog pitanja članovi Predsjedništva ne mogu postići saglasnost.

Muhamed Ramović je naglasio da federalna ministrica finansija nije smjela ovako postupiti, i da je trebala u mjesecu oktobru/listopadu objaviti da će se prilikom izrade Uputstva za 2016. godinu koristiti preliminarni rezultati popisa stanovništva iz 2013. godine, kako bi jedinice lokalne samouprave mogle planirati budžet u skladu s tim. Dodao je da će Općina Goražde na sudu sigurno dobiti i naglašava da je Goražde izgubilo 800,000.00 KM. Istakao je i to da Goražde daje velike doprinose budžetu Federacije Bosne i Hercegovine, s obzirom na činjenicu da su izvoznici. Također je naveo da je ministrica morala sačekati objavu zvaničnih rezultata popisa i naglasio da nije za to da Predsjedništvo Saveza glasa o Uputstvu jer smo uvijek do sada bili jedinstveni.

Nedžad Koldžo smatra da je Muhamed Ramović djelimično u pravu, te da kriterij treba biti takav da se primjenjuje ono što je sada važeće, a da ministrica nije smjela na osnovu indicija donositi Uputstvo.

Ljubo Grizelj je konstatovao da, ako ćemo na načelnoj razini davati doprinos za izradu novog Zakona o pripadnosti javnih prihoda u Federaciji Bosne i Hercegovine, trebamo tražiti da se jednako tretiraju i ekonomski i socijalni kriteriji, te da se uvažavaju različitosti općina.

Nakon rasprave, Predsjedništvo Saveza je jednoglasno usvojilo sljedeće zaključke:

- Federalnom ministarstvu finansija/finansija uputiti urgenciju za uključivanje predstavnika Saveza općina i gradova Federacije Bosne i Hercegovine u

radnu grupu za izradu novog Zakona o pripadnosti javnih prihoda u Federaciji Bosne i Hercegovine;

- Tražiti da novi Zakon o pripadnosti javnih prihoda u Federaciji Bosne i Hercegovine jednako tretira ekonomske i socijalne kriterije, te da se uvažavaju različitosti jedinica lokalne samouprave;
- Tražiti povećanje procenta koji pripada jedinicama lokalne samouprave po osnovu raspodjele javnih prihoda sa 8,42 na 12 %.

Predsjedništvo Saveza je jednoglasno usvojilo i Zabilješku sa sjednice Komisije za ekonomski razvoj općina i gradova i finansije sa zaključcima kako slijedi:

- U Zaključku sa Desete sjednice Predsjedništva Skupštine Saveza općina i gradova Federacije Bosne i Hercegovine, u vezi sa Zakonom o pripadnosti javnih prihoda u Federaciji Bosne i Hercegovine, izmijeniti tačku 5. tako da glasi: „Raspodijeliti 25% prihoda od poreza na dobit jedinicama lokalne samouprave“.
- U Zaključku sa Desete sjednice Predsjedništva Skupštine Saveza općina i gradova Federacije Bosne i Hercegovine, u vezi sa Zakonom o pripadnosti javnih prihoda u Federaciji Bosne i Hercegovine, tačku 6. izmijeniti tako da glasi: „Kao relevantne statističke podatke prilikom raspodjele prihoda koristiti podatke iz evidencije Federalnog zavoda za statistiku i/ili Agencije za statistiku BiH koji se odnose na popis stanovništva iz 2013. godine“;
- U Zaključku sa Desete sjednice Predsjedništva Skupštine Saveza općina i gradova Federacije Bosne i Hercegovine, u vezi sa Zakonom o pripadnosti javnih prihoda u Federaciji Bosne i Hercegovine, brisati tačku 8. koja glasi „Tražiti povećanje pondera Općini Trnovo na 2,2 i Općini Vogošća na 1,8“.

b) Komisija za međunarodne veze, saradnju i evropske integracije

Zlata Turkić je izvijestila o održanoj sjednici Komisije za međunarodne veze, saradnju i evropske integracije.

Vesna Travjanin je informisala da je na sjednici ove Komisije bio prisutan i predstavnik Evropske komisije u Bosni i Hercegovini koji je prezentirao nove projekte i također istakao da je Goražde model koji treba slijediti po pitanju povećanja stope zaposlenosti.

Predsjedništvo Saveza je jednoglasno usvojilo Zabilješku sa sjednice Komisije za međunarodne veze, saradnju i evropske integracije sa zaključcima kako slijedi:

- Predsjedništvo Saveza je primilo k znanju i podržalo Deklaraciju Mreže asocijacija lokalnih vlasti jugoistočne Evrope (NALAS) o suočavanju lokalne samouprave s utjecajem i izazovima izbjegličke krize u jugoistočnoj Evropi;

- **Predsjedništvo Saveza je primilo k znanju informacije o projektima koji se sprovode u saradnji sa međunarodnim organizacijama: GIZ/ORF i NALAS i to:**
 - a) **Prikupljanje podataka o čvrstom otpadu u jugoistočnoj Evropi (SWDC) čiji je cilj da javna komunalna preduzeća i općine u jugoistočnoj Evropi imaju kapacitete da efikasnije razvijaju i koriste podatke o prikupljenom, tretiranom i odloženom komunalnom otpadu i u koji su uključene općine Cazin i Tešanj,**
 - b) **Upravljanje čvrstim otpadom u prekograničnim ruralnim i obalnim područjima regiona jugoistočne Evrope (SWMRCA) čiji je opći cilj poboljšati konceptualni i organizacijski okvir kada je u pitanju integrirano gospodarenje čvrstim otpadom u prekograničnim ruralnim i obalnim područjima sjeverno-istočne Evrope, a specifični cilj je procjena i razvoj shema (modela) za integralno gospodarenje čvrstim otpadom koje su okolišno efikasne i ekonomski pristupačne kako bi se smanjio negativni okolišni i ekonomski utjecaj neodgovarajućeg gospodarenja otpadom i podržao ekološki i socio-ekonomski razvoj prekograničnih ruralnih i obalnih područja u zemljama sjeverno-istočne Evrope. Iz Federacije Bosne i Hercegovine pilot općina na ovom projektu je općina Neum.**
 - c) **Lokalni dužnosnici jugoistočne Evrope: vodstvo za promjenu (LLSEE) čiji je cilj poboljšati kapacitete upravljanja, rukovođenja i saradnje jedinica lokalne samouprave i isporučitelja vodnih usluga, s posebnim naglaskom na unaprijeđenje lokalnih službi i sposobnosti za apsorpiranje međunarodnih finansijskih sredstava. Projekat će poticati razmjenu i širenje savremenih standarda upravljanja među lokalnim vlastima i komunalnim preduzećima u četiri pilot države (Bosna i Hercegovina, Makedonija, Srbija i Hrvatska). Iz Federacije Bosne i Hercegovine pilot općine na ovom projektu su općine Novi Travnik i Kakanj.**
 - d) **Upravljanje imovinom za sektor vodosnabdijevanja i odvodnje u jugoistočnoj Evropi (AM) čiji je cilj podizanje svijesti upravljanja aktivom među donosiocima odluka u postizanju efikasnosti i transparentnosti u upravljanju vodama i sanitarnim infrastrukturama. U prvoj fazi projekta, lokalne zajednice koje su uzele učešće su Grad Zenica i Općina Kiseljak. U drugoj fazi projekta uključena je Općina Velika Kladuša;**
- **Predsjedništvo Saveza je jednoglasno usvojilo prijedlog Komisije za međunarodne veze, saradnju i evropske integracije da se ispred Saveza u Zajednički monitoring komitet IPA II programa prekogranične saradnje Srbija - BiH 2014. - 2020. godina imenuju: Jasmin Šahinović (Općina Velika Kladuša), za člana i Srećko Mikulić (Općina Grude), za zamjenika člana;**

- **Predsjedništvo Saveza je jednoglasno usvojilo prijedlog Komisije za međunarodne veze, saradnju i evropske integracije da se ispred Saveza u Zajednički monitoring komitet IPA trilateralnog programa prekogranične saradnje Hrvatska – Bosna i Hercegovina – Crna Gora 2014. – 2020. godina imenuju: Ismar Alagić (Općina Tešanj), za člana i Dragomir Lučić (Općina Kiseljak), za zamjenika člana;**
- **Predsjedništvo Saveza je jednoglasno usvojilo predloženi zaključak Komisije za međunarodne veze, saradnju i evropske integracije da se iz Sektorskog strateškog dokumenta, koji će biti usvojen do polovine februara/veljače 2016. godine, treba što je moguće više namijenjenih sredstava proslijediti jedinicama lokalne samouprave;**
- **Predsjedništvo Saveza je upoznato sa nizom projekata Evropske unije koji će se implementirati u 2016. godini, a koje je prezentirao predstavnik Evropske komisije:**

Naziv projekta	Implementator	Vrijednost projekta	Napomena
Podrška lokalnim partnerstvima u zapošljavanju	Međunarodna organizacija rada (ILO)	4 miliona EUR-a	
Integrirani lokalni razvoj	Razvojni program Ujedinjenih Nacija (UNDP)	6 miliona EUR-a	
Podrška malim i srednjim preduzećima	Njemačka razvojna agencija (GIZ)	9+4* miliona EUR-a	<ul style="list-style-type: none"> • 4 miliona EUR-a je od Njemacke Vlade

- **Predsjedništvo Saveza je upoznato sa Pozivom za podnošenje zahtjeva za mlade za učešće na Kongresu lokalnih i regionalnih vlasti 30. i 31. sjednice koji će se održati u periodu 22. – 24. mart/ožujak i u periodu 10. – 21. oktobar/listopad 2016. godine koji je potrebno postaviti na web stranicu Saveza i tome obavijestiti jedinice lokalne samouprave.**

c) Komisija za ustavna i zakonodavna pitanja

Vildana Smajović, predsjednica Komisije za ustavna i zakonodavna pitanja je informisala članove Predsjedništva da je 09.02.2016. godine održana sjednica Komisije za ustavna i zakonodavna pitanja. Navela je da je komisija razmatrala inicijative iz Tuzle i Tešnja za koje je zaključila da ih je potrebno precizirati odnosno predložiti konkretne izmjene zakona čije se izmjene traže, te je istakla da je komisija donijela određene zaključke kada je u pitanju aktuelna situacija nakon donošenja Prijedloga zakona o izmjenama i dopunama Zakona o državnoj službi u Federaciji Bosne i Hercegovine.

Predrag Šupljeglav je podsjetio na Rezoluciju koju je usvojila Skupština Saveza i u kojoj je kao jedan od zaključaka navedeno: „Sugerišemo organima zakonodavne vlasti da, na jednak način uredi radnopravni status zaposlenika u jedinicama lokalne samouprave za područje cijele Federacije Bosne i Hercegovine na način da se donese federalni zakon uz saglasnost svih kantona ili da se utvrde opšti principi koje će svi kantoni morati ugraditi u svoje zakone“. Dodao je da je Nacrt zakona o zaposlenicima u organima jedinica lokalne samouprave koji je izradio Savez, bio usvojen u Predstavničkom domu Parlamenta Federacije Bosne i Hercegovine, ali da nije došao na dnevni red sjednice Doma naroda.

Nedžad Koldžo je naveo da je Zakon o izmjenama i dopunama Zakona o državnoj službi u Federaciji Bosne i Hercegovine ishitreno donešen i da se gubi zaštitni mehanizam. Istakao je da to predstavlja klasično degradiranje uprave na čijem su čelu načelnici. Naglasio je da Savez treba tražiti sve da se lokalni nivo izuzme od primjene ovog Zakona.

Ljubo Grizelj je istakao da ima obrnuto mišljenje od prethodnika i naglasio je da je u Zapadnohercegovačkom kantonu iz kojeg dolazi pokrenuta procedura usklađivanja kantonalnog zakona sa usvojenim izmjenama i dopunama federalnog zakona. Istakao je da podržava uvođenje mandata rukovodećim državnim službenicima.

Predrag Šupljeglav je istakao da u tekstu izmjena federalnog zakona o državnoj službi nisu spomenute stvari koje stvaraju najveće probleme kao što je npr. pitanje disciplinskog postupka.

Emir Bubalo je izrazio neslaganje sa usvojenim izmjenama i dopunama federalnog zakona o državnoj službi.

Ivo Jerkić je istakao da su načelnici uvijek dežurni krivci.

Nakon rasprave, Predsjedništvo Saveza je sa 6 glasova „za“ i 1 glasom „suzdržan“ usvojilo zaključak da:

- Savez uputi dopis svim skupštinama kantona/županija u Federaciji Bosne i Hercegovine kojim će tražiti da kantoni/županije prilikom usvajanja kantonalnih/županijskih zakona o državnoj službi (ili njihovih izmjena i dopuna) naglase da se od njihove primjene izuzimaju jedinice lokalne samouprave, te da se radnopravni status zaposlenika u jedinicama lokalne samouprave uredi na jedinstven način;

- Predsjedništvo Saveza je jednoglasno usvojilo i Zabilješku sa sjednice Komisije za ustavna i zakonodavna pitanja sa zaključcima kako slijedi:
- Usvaja se Inicijativa Gradskog vijeća Tuzla za **izmjenu člana 11. Zakona o pravobraniteljstvu Tuzlanskog kantona na način da se daju veće ovlasti pravobraniteljima kod sklapanja sudskih i vansudskih nagodbi u situacijama kada je evidentan gubitak spora, kako bi se smanjili troškovi na ime kamata i troškova vođenja sudskih postupaka** uz sugestiju da se ista doradi i razradi u pravcu utvrđivanja vrste i visine spora;
- Usvaja se Inicijativa Općine Tešanj za pokretanje procedure za izmjenu Općeg Zakona o zadrugama uz sugestiju da se ista doradi i razradi u pravcu konkretnih rješenja odredbi zakona sa tačnim navodima koje članove treba mijenjati i na koji način;
- Usvajaju se zaključci komisije u vezi sa Prijedlogom zakona o izmjenama i dopunama Zakona o državnoj službi u Federaciji Bosne i Hercegovine:
 - odredbe ovog Zakona nisu primjerene i primjenjive na lokalni nivo, te bi primjena istih štetila učinkovitosti i ekonomičnosti rada jedinica lokalne samouprave,
 - Nacrt zakona o zaposlenicima u organima jedinica lokalne samouprave u Federaciji Bosne i Hercegovine ostavlja dovoljno prostora da se ne ugrozi funkcionisanje jedinica lokalne samouprave i predviđa mogućnost da načelnici/gradonačelnici, u skladu sa njegovim odredbama, horizontalnom i vertikalnom preraspodjelom iz reda uposlenika mogu urediti rad jedinica lokalne samouprave na način koji smatraju najoptimalnijim, te isti nije u suprotnosti sa Zakonom o organizaciji organa uprave u Federaciji Bosne i Hercegovine, što je slučaj sa Zakonom o izmjenama i dopunama Zakona o državnoj službi u Federaciji Bosne i Hercegovine;
- Usvaja se zaključak da Predsjedništvo Saveza aktuelizira donošenje Zakona o zaposlenicima u organima jedinica lokalne samouprave u Federaciji Bosne i Hercegovine;

Gradsko vijeće Grada Bihaća je postavilo Upit Federalnom ministarstvu finansija/financija u vezi sa Zakonom o igrama na sreću („Sl.novine FBiH“ br. 48/15 i 60/15) koji se odnosi na svrstavanje prihoda od igara na sreću u kategoriju komunalnih taksi, na što je Federalno ministarstvo finansija/financija odgovorilo da je prihod koji se ostvaruje po osnovu naknada za priređivanje igara na sreću isključivo prihod koji pripada Budžetu Federacije Bosne i Hercegovine i ne može se svrstati u kategoriju komunalnih taksi koji se propisuje, razrezuje i naplaćuje kao prihod jedinica lokalne samouprave na osnovu odluka općinskih/gradskih vijeća. U ovom smislu je sugerisano da se obavijeste jedinice lokalne samouprave u Federaciji Bosne i Hercegovine da u kategoriju komunalnih taksi ne uvrštavaju prihode od igara na sreću.

- **Predsjedništvo Saveza podržava sugestiju da se obavijeste jedinice lokalne samouprave u Federaciji Bosne i Hercegovine da u kategoriju komunalnih taksi ne uvrštavaju prihode od igara na sreću.**
3. Imenovanje predstavnika Saveza u Arbitražna tijela za arbitražu Budžeta općina Usora i Drvar

Predsjedništvo Saveza je jednoglasno usvojilo da se u Arbitražno tijelo za arbitražu Budžeta Općine Usora i u Arbitražno tijelo za arbitražu Budžeta Općine Drvar, ispred Saveza imenuje Senada Katica.

4. Inicijative:

- a) Inicijative za provođenje mjera Akcionog plana za djecu Bosne i Hercegovine 2015. -2018. godina

Selma Fišek je informisala Predsjedništvo da je Ministarstvo za ljudska prava i izbjeglice Bosne i Hercegovine dostavilo Savezu Inicijative za provođenje mjera Akcionog plana za djecu Bosne i Hercegovine 2015 - 2018. godina, kao i preporuke Vijeća za djecu Bosne i Hercegovine za suzbijanje vršnjačkog nasilja i nasilja nad djecom. Naglasila je da se jedinicama lokalne samouprave preporučuje da pristupe realizaciji navedenih mjera i preporuka.

Predsjedništvo Saveza je jednoglasno prihvatilo Inicijative za provođenje mjera Akcionog plana za djecu Bosne i Hercegovine 2015 - 2018. godina, i preporuke Vijeća za djecu Bosne i Hercegovine za suzbijanje vršnjačkog nasilja i nasilja nad djecom.

5. Informacije:

- a) Informacija sa Treće sjednice Komisije za lokalnu samoupravu Predstavničkog doma Parlamenta Federacije Bosne i Hercegovine
- b) Poziv Odbora za pravdu, opću upravu i lokalnu samoupravu Doma naroda Parlamenta Federacije Bosne i Hercegovine za održavanje zajedničkog sastanka sa predstavnicima Saveza

Vesna Travljanin je izvijestila o informacijama pod a) i b) navodeći zaključke sa sjednice Komisije za lokalnu samoupravu Predstavničkog doma Parlamenta Federacije Bosne i Hercegovine koji su dostavljeni u materijalima za sjednicu Predsjedništva. U tom smislu je naglasila da će Savez pružiti pomoć, odnosno uspostaviti komunikaciju sa predstavnicima Općine Goražde u vezi sa Inicijativom za donošenje zakona o izmjenama i dopunama Zakona o federalnim

jedinicama (kantonima) čiji je podnosilac Općinsko vijeće Općine Goražde, koju je razmatrala Komisija za lokalnu samoupravu Predstavničkog doma Parlamenta Federacije Bosne i Hercegovine, a kako bi zajednički pronašli rješenje za ovu inicijativu. Naglasila je da je Odbor za pravdu, opću upravu i lokalnu samoupravu Doma naroda Parlamenta Federacije Bosne i Hercegovine Savezu uputio poziv za održavanje zajedničkog sastanka sa ciljem unapređenja međusobne saradnje.

Predsjedništvo Saveza je primilo k znanju ove informacije.

c) Informacija o održanom sastanku sa gradonačelnikom Grada Sarajeva

Vesna Travljanin je informisala Predsjedništvo da je održan sastanak predstavnika Saveza sa gradonačelnikom Grada Sarajeva i da je tom prilikom istaknuto da je Grad Sarajevo „odledio“ odnose sa Savezom s tim da se ubuduće uvažava status Grada Sarajeva u Predsjedništvu Skupštine Saveza. Također je navela da je gradonačelnik izrazio spremnost da Grad Sarajevo nastavi uplaćivati članski doprinos Savezu počev od 01.01.2016. godine.

Predsjedništvo Saveza je primilo k znanju ovu informaciju.

Vesna Travljanin je u daljem izlaganju informisala članove Predsjedništva da je dogovoren sastanak generalnog sekretara Saveza opština i gradova Republike Srpske Ace Pantića i člana Predsjedništva Bosne i Hercegovine Mladena Ivanića.

Predsjedništvo Saveza je jednoglasno zaključilo da Savez traži održavanje sastanka sa predstavnicima Vlade Federacije Bosne i Hercegovine i sa članovima Predsjedništva Bosne i Hercegovine gdje je potrebno naglasiti značaj lokalnog nivoa vlasti u kontekstu provođenja Reformske agende kao i u procesima pristupanja EU integracijama.

6. Tekuća pitanja

a) Prijedlog za saradnju na Projektu „Gradovi/općine i biznis“ (Općine i gradovi kao poslovni centri konkurentne privrede)

Alena Ahmetspahić – Fočo, urednica Poslovnih novina je ukratko objasnila šta je to čime se bave Poslovne novine i istakla je da smatra da bi se mogao napraviti projekat u suorganizaciji Saveza i Poslovnih novina. Cilj projekta bi bio ukazati građanima na koji način općine pokreću biznis, organizirale bi se panel diskusije sa načelnicima i istaknutim privrednicima, a što bi imalo medijsku podršku. Naglasila je da bi se u narednim godinama mogli planirati susreti i proglašenje najboljih općina. Iznijela je prijedlog da se u septembru/rujnu 2016. godine organizuje završna konferencija na kojoj bi se obezbijedili pokloni sponzora za pobjednike i gdje bi se dijelili specijalni primjerci Poslovnih novina.

Napomenula je da bi se na osnovu dogovorenih kriterija odredile najbolje i najuspješnije općine koje bi bile proglašene na završnoj konferenciji. Dodala je također da bi bilo potrebno odrediti članove zajedničkog Organizacionog odbora koji bi pripremio pitanja i anketne podatke za jedinice lokalne samouprave, te bi se išlo sa zajedničkim pismom prema partnerima i sponzorima.

Nedžad Koldžo je iznio mišljenje da je ovo klasični komercijalni program. Naglasio je da je Savezu potrebno dostaviti prijedlog konkretnog projekta sa indikatorima, ciljevima i navedenim kriterijima koji će proći kroz nadležne strukture Saveza, te ga onda predstaviti Predsjedništvu Saveza.

Muhamed Ramović i Asim Mekić su istakli da podržavaju ovu ideju Poslovnih novina.

Vildana Smajović je naglasila da se u prijedlogu projekta moraju navesti anketna pitanja jer je nemoguće očekivati od općina da se dogovore oko kriterija.

Vesna Travljanin je pojasnila da je zbog termina lokalnih izbora bitno da se Predsjedništvo izjasni da li podržava nastavak aktivnosti na ovom projektu.

Nedžad Koldžo smatra da do septembra nema dovoljno vremena za realizaciju predviđenih aktivnosti.

Predsjedništvo Saveza je jednoglasno podržalo prijedlog za saradnju Saveza na Projektu „Gradovi/općine i biznis“ (Općine i gradovi kao poslovni centri konkurentne privrede) s tim što je u narednom periodu potrebno dogovoriti modalitete i detalje zajedničke saradnje.

b) Treće evropsko prvenstvo u nogometu za gradonačelnike

Vesna Travljanin je informisala Predsjedništvo da je Udruga gradova Republike Hrvatske Savezu dostavila informacije o održavanju Trećeg evropskog prvenstva za gradonačelnike koje će se u mjesecu maju/svibnju 2016. godine održati u Republici Češkoj, te da se zainteresovani mogu prijaviti na ovo takmičenje.

Predsjedništvo Saveza je primilo k znanju ovu informaciju.

Pod tekućim pitanjima Predsjedništvo Saveza je dalo podršku akciji za pomoć u izgradnji Roditeljske kuće za smještaj djece oboljele od raka i njihovih roditelja

koji dolaze na liječenje izvan Kantona Sarajevo, te je zaključeno da se uputi dopis svim jedinicama lokalne samouprave da se uključe u ovu humanu akciju.

Ivo Jerkić je delegirao pitanje Zakona o turističkim zajednicama zbog njegove važnosti za jedinice lokalne amouprave.

Predsjedništvo Saveza je zaključilo da je potrebno urgirati za donošenje Zakona o turističkim zajednicama, i zahtijevati da se u radnu grupu za izradu Zakona uključe i predstavnici jedinica lokalne samouprave.

Selma Fišek je informisala članove Predsjedništva da je Skupština Kantona Sarajevo dostavila Savezu na mišljenje Nacrt zakona o platama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo. Dodala je da je predmetni Nacrt zakona dostavljen i svim općinama u Kantonu Sarajevo, te da javna rasprava o istom traje deset dana.

Predsjedništvo Saveza je zaključilo da općine iz Kantona Sarajevo dostave Skupštini Kantona Sarajevo svoje eventualne komentare i sugestije na Nacrt zakona o platama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo.

Ivo Jerkić je obavijestio članove Predsjedništva da je predloženo održavanje zajedničke sjednice Predsjedništva Saveza općina i gradova Federacije Bosne i Hercegovine, Predsjedništva Saveza općina i gradova Republike Srpske i Predsjedništva Udruge gradova Republike Hrvatske, te da će se termin održavanja sjednice naknadno odrediti uz prijedlog da mjesto održavanja sjednice bude Etno selo u Čitluku.

Predsjedništvo Saveza je primilo k znanju ovu informaciju.

Nakon konstatacije da su sve tačke Dnevnog reda iscrpljene, Ivo Jerkić je zatvorio Jedanaestu sjednicu Predsjedništva u 14.30 sati.

Zapisnik sačinila
Selma Fišek

Predsjednik Predsjedništva Skupštine Saveza
Ivo Jerkić, s.r.